

Piita Ɔwole Gyangbarase

¹ Me Piita Ɔbono n gyɛ Yesu Kirisito ƆsoƆ mƆ ne n kya ɲmarase Ɔwole baare. N kya ɲmarase mi-i sa fɛye abono Wurubuaare gi tƆƆse lɛɛ yɛɛ Ɔ laa lɔrɔ fɛye yela sa mƆ-nyoro, ne fɛ yaase kpe fɛ tɛ fɛ tɛ fɛ kya gyi gisafo Pontuse, Galati, Kapadosiya, Esiya de Bitiniya nsinkpan so mƆ. ² Pɛi ne aye-se Wurubuaare laa lɛɛ ilaa kamaase mƆ, Ɔ wolaa bii fɛye. Ɔ bii fɛye gɛnen mƆ, Ɔ tƆƆse fɛye lɛɛ ne Ɔ yɛgɛ Wurubuaare Oduduu mƆ gi lɔrɔ fɛye yela sa mƆ Wurubuaare de fɛ' nyɛ nu Yesu Kirisito gɛdɛ de Yesu nkalan mƆ gi' kpaare fɛye-ilaa nyɛnyɛn fuɛ sa fɛye. Wurubuaare Ɔ' sa fɛye so gɛwɔnsa dɛnsɛ de Ɔ' sa fɛye gisen yuuli Ɔ kya bɔla.

Aye-Ansi A Gyan' Wurubuaare Amɔlegɛ So

³ Afaala a gyɛ Wurubuaare, aye-Wura Yesu Kirisito mƆ-se mƆ-lɛɛ! O su aye gitolon belɛ. Kyu naa de Yesu Kirisito giwukyingi mƆ so mƆ Wurubuaare gi yɛgɛ i lɔrɔ korogɛ aye wɔra anyamesɛ pobɔrɔ. Gɛnen so ne aye-ansi a gyan ilaa dɛnsɛ iko so, ne gɛnen ilaa ibono i maɲ gbangɛ. ⁴ I kya nyiile yɛɛ a laa baa nyɛ Wurubuaare ilaa dɛnsɛ ibono Ɔ baala yela sa aye Wurubuaare dɔ mƆ. Gɛnen ilaa dɛnsɛ ibono berɛ iɲ kya ta ɔkara. Ineesi iɲ bo imƆ dɔ ne iɲ kya nyida kpa-a. ⁵ Wurubuaare dɛ mƆ-ɔlon Ɔ kya kun fɛye. Kyu naa de ibono fɛ ka gyan Yesu so mƆ, Ɔ laa kpe Ɔ kya kerɛ fɛye so gɛnen de gɛkɛ laalalogɛ gɛbono gɛkyena gɛdɛ gɛ laa baa yela ɔkara mƆ, Ɔ' mɔlegɛ fɛye de fɛ' nyɛ kyena mƆ ase. Ɔ ti baala ta ibono Ɔ laa lɛɛ gɛnen amɔlegɛ abono gɛwi.

⁶ Ibono feye-ansi a gyan' amolege ade so mo i yeye fe kya yaale ne fe kya gyi okon bele. I bo no yee genen owi baare do bere mo fonbii aworofoo kpei-kpei a kya tu feye ne fe kya yiyee. Genen aworofoo de geyiyee mo a man de kpe. ⁷ Aworofoo a kya tu feye genen mo, i men gyee giyan. Fe' bii yee i kya daase feye-gikagyan gibono fe ka gyan' Yesu so mo i kya kere daa de i' nye lii gawi yee feye-gikagyan gi gyee gesintin gikagyan. I de daa fee sika kokoo de ogya. Peki ne fe laa bii yee sika kokoo gyee sika kokoo gbaa-gbaa mo, ogya ne me kya kyu to mo de i' dee ibono in gyee sika kokoo mo lii mo do. Feye-gikagyan gibono fe ka gyan' Yesu so mo gi tansi gi tiri don sika kokoo obono mo-odan kya yela okara mo. Nengyene aworofoo mo a lee feye-gikagyan mo nyiile yee gi gyee gesintin gikagyan mo, i laa sa feye ayenbi, nyisigy, de buubuu geakaabono Wurubuaare laa lee Yesu Kirisito gawi nyiile nyamesee kamaase mo.

⁸ Feh kya wu Yesu Kirisito de ansi bere. Imo-re imo genen gbaa mo, fe kya laare mo-ilaa ne fe kya ka gyan' mo so. Yesu so mo fe kya yaale ne fe kya gyi okon bele obono nyisigy bo mo do ne feh nyi mo-okara mo. ⁹ Nteela nbono feye-gikagyan gidde gi kya sa feye mo ne n gyee yee Wurubuaare kya molege feye, ne feye-re mo nsana i kya nye wora okon.

Wurubuaare Ikalani Atogeboni De Mo-Isa

Me Laare Me' Nu Okalan Baare Ilaa

¹⁰ Wurubuaare ikalan atogeboni me wolaa wu genen Wurubuaare amolege abono so ilaa toge. Me toge genobono Wurubuaare laa wora ilaa gbaa' sa aye mo. Momo gbaa-gbaa bere me men nu imo geese. Imoso me peere ansi loo imo do taase-taase. ¹¹ Kirisito Oduduu obono o bo momo do mo kya nyiile momo

yEE obono Wurubuaaree laa sun de o' baa molegee asa mo laa wu olaawuse de imo gemara mo o' nye nyisigy belee. Wurubuaaree ikalan atogebo ade me laare de me' nye bii genen nyamese kolon obono Kirisito Oduduu mo dare mo. Me kii laare de me' bii owi obono genen omolegebo obono laa ba mo. ¹² Nfono mo, Wurubuaaree gi lee nyiile momo yee i meη gye momo gbaa-gbaa so ne o sa genen ikalan mo. Wurubuaaree gi nyiile omo yee me kya toge mo-ikalan mo genen mo, me kya toge me kya yela daa momo-gemara awura. Gesintin, momo-gemara mo, Kirisito gi baa molegee asa. Imo gemara mo, Wurubuaaree gi sun mo-Oduduu lii Wurubuaaree do. Wurubuaaree Oduduu mo gi baa yeege asa me kya toge genen omolegebo obono ilaa ma-a sa feye. Wurubuaaree do isoo gbaa, i kya da omo kpa-kpa, me kya laare me' bii genen okalan konkonsē baare ilaa.

Fe' Kyena Gisen Fufuli Awura Akyenabi

¹³ Gekaabono Wurubuaaree laa baa lee Yesu Kirisito gewi nyiile asa gesinkpan so mo, o laa kyu mo-gidense gibono o bo mo yuule feye de o' sa feye gekyena gekpaa. Imoso fe' kyu feye-ansi gyan' genen ayuule abono so de fe' dese feye-nyoro so. Feη sa fe' kyu imo seeli.

¹⁴ Fe' nu feye-se Wurubuaaree gedē fēē nbii dēnsē; feη' baa kyena fēē owi obono feη ti bii sei kyu lii Wurubuaaree so ne feye-obole gelaare ilaa ne n gyi feye-amu mo. ¹⁵ Wurubuaaree obono o toge feye yee feye-re mo fe' wōra nyamese kolon mo gye gisen fufuli wura. Imoso feye kee fe' kyu gisen fufuli akyenabi kyu kyena.

¹⁶ Wurubuaaree gi toge mo-agyebi mo do yee,
 “Fe' wōra gisen fufuli awura.

I lii fēē me, n gye gisen fufuli wura.”

¹⁷ Fɛ kya dalaa mɔ, fɛ kya terɛ Wurubuaarɛ yɛɛ fɛye-sɛ. Mɔ ne n gyɛ ɔbono ɔ kya kyu gɛsintin gyi anyamesɛ pɛwu nbɛlɛ naa de mɔmɔ-ilaa wɔrase so. Ɔŋ kya ligi ɔko. Imɔso fɛ' seɛ mɔ fɛye-gisafo gɛkyena gɛbono fɛ tɛ gɛsinkpan so faa dɔ. ¹⁸ Nkana fɛ tɛ akyenabi abono aŋ kya kpaa nyamesɛ Wurubuaarɛ ase mɔ. Fɛye-naanaana ne n kyena gɛnen gɛkyena gɛbono san sa fɛye. Wurubuaarɛ, mɔ, gi lɛɛ fɛye lii imɔ ibono dɔ, ne ɔ sa fɛye gɛkyena pobɔɔ. Fɛye gbaa-gbaa fɛ nyi yɛɛ ilaa ibono o kyu mɔlɛgɛ fɛye mɔ imɔ-oduduu mɛŋ kya kɔɔgɛ fɛɛ sika kɔkɔ abɛɛ aterenbi. ¹⁹ I gyɛ daa Kirisito nkalan nbono aterenbi a maŋ taalɛ sɔɔ nmɔ mɔ ne Wurubuaarɛ gi kyu mɔlɛgɛ fɛye gɛnen. O wu' kyɛɛgɛ mɔ-nkalan fue sa aye. Ɔ wɔra fɛɛ sandɛ ɔbono ɔ kyena sa asunbi gilɛɛ mɔ. I kya nyiile yɛɛ mɔ-gisen dɔ i fuuli, ne ɔŋ bo ilaa nyɛnyɛn. ²⁰ Pɛi ne soso de gɛɛɛ i' lɔɔ wɔra ilɛɛɛ mɔ, i wolaa i dɛ yɛɛ Kirisito laa wɔra asa ɔmɔlɛgɛbo. Gɛɛɛ gɛɛɛ i kya laarɛ i' yela ɔkara faa mɔ, Wurubuaarɛ gi san lɛɛ ɔmɔlɛgɛbo mɔ gɛwi nyiile asa. Fɛye so ne ɔ wɔra gɛnen. ²¹ Kyu naa de Kirisito so ne fɛ kya nyɛ sɔɔ Wurubuaarɛ gyi faa. Wurubuaarɛ gi kyingi mɔ lii ibuni dɔ ne ɔ sa mɔ nyisigyɛ. Gɛnen so ne fɛ kya ka gyan Wurubuaarɛ so, ne fɛye-gɛwɔnsa gɛ gyan mɔ so.

²² Ibono fɛ nu gɛsintin kyu lii Yesu so ne fɛ kya gyi gɛnen gɛsintin mɔ so faa mɔ, i yɛgɛ fɛ taa ilaa nyɛnyɛn ibono nkana fɛ kya wɔra mɔ yɛgɛ, ne fɛ san fɛ kya laarɛ fɛye-nanboana Yesu asonbo mɔ ilaa gɛsintin so. Imɔso fɛ' pɛɛɛ ansi laarɛ abara ilaa gɛnen lii fɛye-asen dɔ. ²³ I kya nyiile yɛɛ kyu naa de Wurubuaarɛ gigyɛbi mɔ so mɔ, ɔ yɛgɛ i lɔɔ korogɛ fɛye ne fɛ wɔra mɔ-biana gɛsintin. Aye-sɛ Wurubuaarɛ bo no gɛkpaa-gɛkpaa. Ɔ maŋ wu' gɛkaako. Mɔ-gigyɛbi gibono o kyu korogɛ aye mɔ gi bo gya, ne gi kpɛ gi bo no adaa-adaa. ²⁴ Wurubuaarɛ ikalan

ɔtɔgebo ɔko mɛ kya terɛ mɔ yɛɛ Isaya gi tɔge mɔ-ɔwɔle dɔ yɛɛ,

“Anyamesɛ pɛwu mɔmɔ-rɛ mɔmɔ-nyisigyɪ
mɛ dɛ daa fɛɛ ifɛ de iyii afototo.

Ifɛ i laa wu', ne iyii afototo a laa kpiisi.

²⁵ Wura Wurubuaarɛ gigyɛbi mɔ berɛ,
gi kpɛ gi bo no gɛkpaagɛkpa.”

Gɛnen gigyɛbi gibono ne n gyɛ Yesu ɔkalan konkonsɛ mɔ
asa mɛ tɔge sa fɛye mɔ.

2

¹ Imɔso fɛ' lɛɛ gɛkyo kamaasɛ lii fɛye-asen dɔ. Fɛɲ sa fɛ' penɛ asa. Fɛɲ sa fɛ' wɔra ilaa ansi so giyan. Fɛ' taa gɛlaaloo yɛgɛ. Fɛɲ sa fɛ' saalɛ asa. ² Fɛɛ gɛnɔɔbono kyokyoo mɛɲ nyɛ ginyabo ne ɔɲ kya taalɛ kyena mɔ, fɛ' yɛgɛ Wurubuaarɛ agyɛbi mɔ a' da fɛye ɔbolɛ gɛnen kee. Mɔ-agyɛbi mɔ a gyɛ gɛsintin. A kya sa nyamesɛ oduduu dɔ ɔlon. Imɔso fɛ kya nu agyɛbi mɔ, fɛ laa wɔra fɛɛ kyokyoo ɔbono ɔ kya nyabo ne ɔ kya sen mɔ. Wurubuaarɛ agyɛbi mɔ ne nan yɛgɛ fɛ' sɛɛ oduduu dɔ de fɛ' nyɛ Yesu amɔlɛgɛ de fɛye-rɛ mɔ nsana i' wɔra ɔkon. ³ I lii fɛɛ fɛye kee fɛ ti daa Wura Yesu gidɛnsɛ gibono ɔ bo sa aye anyamesɛ mɔ kerɛ.

Yesu So Mɔ, Fɛ Dɛ Fɛɛ Wurubuaarɛ Obu Asodoo

⁴ Fɛ' kyu fɛye-nyoro sa Wura Yesu. ɔ dɛ fɛɛ gisodoo gibono gi kpɛ gi bo no, ne anyamesɛ mɛ kine gimɔ mɔ. Gimɔ, mɔ, ne Wurubuaarɛ gi lɛɛ yɛɛ gi bo agyan sa mɔ ne gi kya gyi mɔ-ginsi. ⁵ Fɛye kee kyu lii Yesu so mɔ fɛ dɛ fɛɛ asodoo abono a kpɛ a bo no mɔ. Imɔso fɛ' yɛgɛ Wurubuaarɛ o' kyu fɛye pɔɔɔ oduduu dɔ obu. Wurubuaarɛ gi yɛgɛ mɔ-gisen dɔ ilaa ne n san i gyan' fɛye-ansi so fɛɛ mɔ-asunbi alɛɛbo ne fɛ gyɛ de fɛ' nyɛ fɛ kya lɛɛ oduduu dɔ asunbi fɛ kya sa mɔ. Kyu naa de

Yesu Kirisito so mɔ, Wurubuaarɛ laa sɔɔ gɛnen asunbi abono abaa anyɔ. ⁶I lii fɛɛ i bo mɔ Wurubuaarɛ agyɛbi dɔ yɛɛ,

“Fɛ! kerɛ! Me Wurubuaarɛ nɛ lɛɛ gisodoo
gibono gi laa yɛgɛ me-ɔson obu mɔ ɔ' nyɛ ɔlon yelɛ
mɔ.

Gɛnen gisodoo gibono gi tansi gi kya gyi me-ginsi.
N dɛ gimɔ mi-i too obu gɛsɛ ɔpɔɔrɛ Sayon ɔsowolɛ so.
ɔbono ɔ laa ka gyan' gɛnen gisodoo gibono so mɔ
ipeeli i maŋ gyi mɔ kpa-a.”

⁷Yesu ne n gyɛ gɛnen gisodoo mɔ. Fɛye abono fɛ ka gyan' mɔ so mɔ, ɔ tansi ɔ bo agyan sa fɛye. Asa abono mɔmɔ berɛ mɛŋ kya ka gyan' mɔ so mɔ, i bo Wurubuaarɛ agyɛbi mɔ dɔ gɛtɛeko kyu lii mɔmɔ so yɛɛ,

“Ibu apɔrɔbo mɛ kyu gisodoo mɔ too gɛbaamara,
ne gɛmara gɛmara mɔ gɛnen gisodoo mɔ, mɔ,
ne Wurubuaarɛ gi san baa kyu pɔrɔ mɔ-ɔson obu mɔ
ne obu mɔ gi nyɛ ɔlon yelɛ.”

⁸Wurubuaarɛ gi wolaa wu tɔgɛ yela yɛɛ,
“Gisodoo gidɛ gi laa yɛgɛ anyamesɛ mɛ laa sidi de mɛ'
lii tɔrɔ.”

Ibono so Yesu laa yɛgɛ anyamesɛ mɛ sidi gɛnen mɔ ne n gyɛ yɛɛ mɛ kya wɔra gisomaanu de Wurubuaarɛ agyɛbi mɔ. Gɛnen gisomaanu gibono gi gyɛ daa ilaa ibono i wolaa i dɛ sa mɔmɔ.

⁹Fɛye abono fɛ ka gyan' Yesu so mɔ berɛ, Wurubuaarɛ gi tɔɔsɛ fɛye lɛɛ yɛɛ fɛ laa bingiri fɛɛ gɛsu kolon dɔ asa. Fɛ bingiri fɛɛ awuragyibo asunbi alɛɛbo sa Wura Wurubuaarɛ. Fɛye ne ɔ lɔrɔ yela sa mɔ-nyoro lii nsinkpan kpɛi-kpɛi so asa dɔ. Fɛ gyɛ daa mɔ gbaa-gbaa lɛɛ adɛ. Wurubuaarɛ gi tɔɔsɛ fɛye lɛɛ de fɛ' nyɛ fɛ kya lɛɛ mɔ-ginyen. I lii fɛɛ mɔ ne n biidɛ fɛye lii gibiri dɔ baa mɔ-fatela dɔ nfono i bo ɔbolɛ ne i kya dɛ gɛnɔ mɔ. ¹⁰Owi

ɔko dɔ mɔ nkana fɛ mɛŋ gyɛ asa ako sa Wurubuaarɛ. Idɛ kon, fɛ baa wɔra Wurubuaarɛ-lɛɛ adɛ gɛsintin so. Nkana Wurubuaarɛ mɛŋ su fɛye gitolon. Idɛ kon, Wurubuaarɛ gi su fɛye gitolon.

Fɛ' Kyena Akyenabi Dɛnsɛ

¹¹ Mɛ-nanboana laarɛsɛ, a gyɛ daa fɛɛ asafo gɛsinkpan so. A gyɛ daa akpakyonbo. Imɔso n kya kolɛ fɛye, fɛŋ sa fɛ' yɛgɛ gɛsinkpan so ilaa i' gyi fɛye-amu. Gɛnen ilaa ibonoana i kya kɔ de fɛye de i' nyɛ nyida fɛye-nwɔnsa. ¹² Fɛ tɛ saarɛ asa abono mɛ mɛŋ kya son Wurubuaarɛ faa mɔ, fɛ' yɛgɛ fɛye-gɛkyena gɛ' wɔra gɛkyena dɛnsɛ. Nengyene i ba yɛɛ mɛ ten fɛye-gɛnɔ yɛɛ fɛ gyɛ ilaa nyɛnyɛn awɔrabo mɔ, mɛ laa wu fɛye-gidɛnsɛ gibono fɛ kya wɔra mɔ de mɛ' yen Wurubuaarɛ kyu lii gimɔ so gɛkaabono ɔ laa baa laa aye mɔ.

Fɛ' Bara Fɛye-Nyoro Gɛsɛ

¹³ Kyu lii aye-Wura Yesu Kirisito so mɔ, fɛ' bara fɛye-nyoro gɛsɛ sa nyamesɛ kamaasɛ ɔbono ɔ kya gyi gɛbelɛnsɛ fɛye so mɔ. Fɛ' bara fɛye-nyoro gɛsɛ sa ɔbono ɔ kya gyi gɛwura fɛye so ¹⁴ de abono ɔ yela gɛbelɛnsɛ buu de mɔ-nyoro mɔ kee. I lii fɛɛ ɔ yela ɔmɔ daa de mɛ' biidɛ ilaa nyɛnyɛn awɔrabo giso de mɛ' yen abono mɛ kya wɔra ilaa ibono i boran mɔ. ¹⁵ I gyɛ daa Wurubuaarɛ gɛlaarɛ yɛɛ fɛ' wɔra ilaa ibono i kaaborɛ mɔ, de i' yɛgɛ ginyantɔgɛ awura mɛ' bun mɔmɔ-nnɔ so. ¹⁶ Fɛ kya bara fɛye-nyoro gɛsɛ gɛnen mɔ, iŋ gyɛ yɛɛ fɛ gyɛ nbide berɛ. Fɛŋ sa fɛ' tɔgɛ yɛɛ fɛŋ tɛ sa ɔko so mɔ, fɛ laa wɔra fɛye-ɔbole gɛlaarɛ ilaa ibono iŋ boran sa Wurubuaarɛ mɔ. Fɛ' wɔra daa Wurubuaarɛ nbide. ¹⁷ Fɛ' kyu buubuu sa anyamesɛ pɛwu. Fɛ' laarɛ abono fɛye-rɛ ɔmɔ fɛ bo Yesu ɔson mɔ dɔ mɔ ilaa. Fɛ' seɛ Wurubuaarɛ de fɛ' buu ɔbono ɔ kya gyi gɛwura fɛye so mɔ.

¹⁸ Fɛye abono fɛ tɛ awura asɛ mɔ, fɛ' bara fɛye-nyoro gɛsɛ sa fɛye-wuraana de fɛ' kyu buubuu sa mɔmɔ fɛɛ gɛnɔɔbono i kaaborɛ mɔ. Iɲ sa i' wɔra yɛɛ abono mɛ kya wɔra fɛye gidɛnsɛ abɛɛ mɛ kya su fɛye so mɔ wolɛ. Fɛ' dabɔlɛ buu abono mɛ kya wɔra fɛye gɛnɔ mɔ de fɛ' bara fɛye-nyoro gɛsɛ sa mɔ. ¹⁹ Fo ɔko fo kya wu ɔlaawusɛ ɔbono iɲ kaaborɛ fo wu mɔ ne fo nyɛ gisen Wurubuaarɛ so mɔ, i kya gyi Wurubuaarɛ ginsi. ²⁰ Nengyene fo nyamesɛ fo wɔra ilaa nyɛnyɛn, ne mɛ biidɛ fo-giso imɔ so ne fo nyɛ gisen mɔ, i kaaborɛ fo' nyɛ afaala ako? Kuua. Fɛɛ ilaa dɛnsɛ berɛ ne fo wɔra ne fo kya wu imɔ so ɔlaawusɛ mɔ, nyɛ gisen daa. Fo nyɛ gisen gɛnen ɔlaawusɛ ɔbono dɔ mɔ, imɔ ibono ne n kya gyi Wurubuaarɛ ginsi.

²¹ Yesu Kirisito kee gi nyɛ gisen owi ɔbono ɔ kya wu ɔlaawusɛ ɔ kya sa fɛye mɔ. O kyu wɔra sinkaala yela yɛɛ fɛye kee fɛ' kyule de fɛ' wu ɔlaawusɛ fɛɛ mɔ-lɛɛ mɔ ɔnan. Gɛnen gɛkyena gɛbono ɔnan ne Wurubuaarɛ yɛɛ gɛ' wɔra fɛye-lɛɛ.

²² Yesu mɛɲ wɔra ilaa nyɛnyɛn iko kerɛ.

ɔko-rɛ ɔko mɛɲ nu gɛkaako yɛɛ ɔ taa kɛɛ abon kerɛ.

²³ Asa mɛ saalɛ mɔ mɔ, ɔ mɛɲ saalɛ mɔ ka gikɔ.

O wu ɔlaawusɛ asa abaa dɔ mɔ, ɔ mɛɲ tɔgɛ sa mɔmɔ yɛɛ,

“Fɛ' yɛgɛ de-e, fɛ laa wu me kyule.”

O nyi ibono Wurubuaarɛ laa gyi asa nbɛlɛ gɛsintin ɔkpa so.

Imɔso o kyu imɔ pɛwu-u wɔra Wurubuaarɛ abaa dɔ.

²⁴ Yesu gi kyu aye-anyamesɛ ilaa nyɛnyɛn sola owi ɔbono mɛ da mɔ aɲanbi mada de oyii mɔ. Mɔ gbaa-gbaa nyoro ne o kyu so aye-gisobiidɛ. ɔ wɔra gɛnen daa de a' nyɛ lɛɛ abaa lii ilaa nyɛnyɛn giwɔra dɔ de a' nyɛ a kya gyi gɛsintin a kya sa Wurubuaarɛ aye-gɛkyena dɔ. Ilo ibono

Yesu gi nyɛ lii awɔɔɔɔ abono o wu kyu lii aye so mɔ i yɛgɛ aye-nyoro gi' tɔɔ aye. ²⁵ Nkana a fuɛ Wurubuaarɛ ɔkpa mɔ fɛɛ gɛnɔɔbono isandɛ mɛ kya fuɛ mɛ naa mɛ naa mɔ. Idɛ kon berɛ a kii ba aye-ɔkparɛbo Yesu asɛ. Mɔ ne n gyɛ ɔbono ɔ kya kerɛ aye so.

3

Akyii Mɛ' Bara Mɔmɔ-Nyoro Gɛsɛ Sa Mɔmɔ-Kuliana

¹ Gɛnen kee ne fɛye akyii mɔ, fɛ' bara fɛye-nyoro gɛsɛ sa fɛye-kuliana. Nengyene mɔmɔ dɔ ako mɛ kine Wurubuaarɛ ɔkalan mɔ mɔ, kyu lii fɛye-akyeɛnabi dɛnsɛ abono fɛ laa kyu kyena de ɔmɔ mɔ so mɔ, i laa yɛgɛ mɛ' kyɛɛgɛ mɔmɔ-nwɔnsa. I maɲ baa tiri yɛɛ fɛ' tɔgɛ ɔkalan mɔ sa mɔmɔ. ² I kya nyiile yɛɛ fɛye-kuliana mɔ mɛ laa wu gɛnɔɔbono fɛ dɛ buubuu fa-a sa Wurubuaarɛ ne fɛ kya gyi gɛsintin sa ɔmɔ fɛye-gɛkyena dɔ mɔ. ³ Fɛye-ɔdan ɔbono fɛ bo mɔ ɔɲ sa ɔ' wɔra nyoro gilɔɔ wolɛ, fɛɛ iman giɲminde abɛɛ sika kɔkɔɔ agbangbaran gikyɛ abɛɛ akuru dɛnsɛ gidela. ⁴ Fɛ' yɛgɛ fɛye-asen dɔ ne i' lɛɛ fɛye-ɔdan ɔbono fɛ bo mɔ nyiile. ɔdan ɔbono ɔɲ kya nyida gɛkaako mɔ ne n gyɛ ibono fo ɔko fo laa bara fo-nyoro gɛsɛ de fo' yela fo-gɛwɔnsa gɛten kolon. Gɛnen ɔdan ɔbono ne n kya gyi Wurubuaarɛ ginsi.

⁵ Adedaabo owi mɔ, gɛnen ne mɔmɔ akyii abono mɛ kyu mɔmɔ-nyoro too Wurubuaarɛ so mɔ mɛ kyu lɔɔ mɔmɔ-nyoro ne. Mɛ kyu mɔmɔ-ansi gyan Wurubuaarɛ so ne mɛ bara mɔmɔ-nyoro gɛsɛ sa mɔmɔ-kuliana. ⁶ Gɛnen akyii abono dɔ ɔko ne n gyɛ Sara. O nu mɔ-kuli Aberaham gɛdɛ, ne o kyu buubuu sa mɔ yɛɛ mɔ-wura ne. Nengyene fɛye kee fɛ laa wɔra ilaa ibono i boran mɔ ne fɛɲ selɛ gifuu mɔ, fɛ laa wɔra fɛɛ Sara baarɛ mɔ-biana gɛsintin.

FƎye Anyen FƎ' Kyu Buubuu Kyena De FƎye-Kaana

⁷ GƎnen kee ne fƎye anyen mƆ, mƆ, fƎye-rƎ fƎye-kaana fƎ tƎ mƆ, fƎ' su mƆmƆ so yƎƎ mƎŋ bo lon fo fƎye. ImƆso fƎ' kyu buubuu kyu kyena de mƆmƆ. I lii fƎƎ WurubuaarƎ laa sa fƎye-rƎ ƆmƆ kpini mƆ ase gƎkyena. FƎ' kyena de mƆmƆ gƎnen de fƎye-ndalaa nbono fƎ laa dalaa kole WurubuaarƎ mƆ, sƎi-sƎi Ɔ mƎŋ sa Ɔ' nyƎ tii nmƆ-Ɔkpa.

FƎ' Kyena De Abara KanƎ

⁸ PƎi de me-gƎnƆ gƎ yii mƆ, fƎye abono fƎ ka gyan' Yesu so mƆ pƎwu, fƎ' wƆra gƎnƆ kolon. FƎ' su abara so de fƎ' laarƎ abara ilaa. FƎ' wƆra ilaa ibono i laa yƎgƎ asa asen a' tƆrƆ mƆmƆ mƆ de fƎ' bara fƎye-nyoro gƎƎ sa abara. ⁹ FƎŋ sa fƎ' kyu ilaa nyƎnyƎn kyu ka ilaa nyƎnyƎn gikƆ abƎƎ fƎƎ Ɔko gi saalƎ fƎye mƆ, fƎ' saalƎ mƆ ka gikƆ. FƎye berƎ, fƎ' kolƎ daa WurubuaarƎ ayuule sa gƎnen asa abono. WurubuaarƎ kya laarƎ fƎ' nyƎ mƆ-ayuule so ne Ɔ tƆgƎ fƎye yƎƎ fƎ' son mƆ mƆ. ¹⁰ I dƎ daa fƎƎ gƎnƆƆbono mƎ ŋmarasƎ WurubuaarƎ agyƎbi mƆ dƆ mƆ. MƎ ŋmarasƎ yƎƎ,

“Fo Ɔbono fo kya laarƎ gƎkyena dƎnsƎ
ne fo kya laarƎ fo' gyi Ɔkon fo-gƎkyena dƆ mƆ,
kerƎ fo-gƎnƆ so dƆƆdan.

Foŋ sa fo' tƆgƎ ilaa nyƎnyƎn abƎƎ fo' keƎ abon.

¹¹ Kine ilaa nyƎnyƎn giwƆra de fo' san wƆra daa ilaa dƎnsƎ.

Nyanga ansi de fo' wƆra ilaa ibono i laa bara gisen yuuli mƆ.

¹² I kya nyiile yƎƎ Wura WurubuaarƎ kya kerƎ
asa abono mƆmƆ-asen dƆ i boran sa mƆ mƆ so,
ne Ɔ kya nu mƆmƆ-ndalaa.

Asa abono mƎ kya wƆra ilaa nyƎnyƎn mƆ berƎ,
mƆmƆ-rƎ Wura WurubuaarƎ ansi a laa wƆra anan.”

Fo-Gesintin So Ne Fo Kya Wu ɔlaa Mɔ, Wurubuaarɛ Laa Yuule Fo

¹³ Nengyene ilaa dɛnsɛ giwɔra ne n kpɛ i bo fɛye-ansi so mɔ, anɛ ne nan wɔra fɛye ilaa nyɛnyɛn? ¹⁴ Ba-a ne ako mɛ kya yɛgɛ fɛ' wu ɔlaa lii fɛye-gɛsintin gigyi so mɔ, fɛ gyɛ daa amudɛnsɛbo Wurubuaarɛ asɛ. Fɛɲ sa fɛ' yɛgɛ mɔmɔ-aɲaala a' wɔra fɛye gifuu abɛɛ i' wɔra fɛye gɛwɔnsa.

¹⁵ Fɛye berɛ fɛ' kyu buubuu sa Kirisito lii fɛye-asen dɔ yɛɛ mɔ-nkon ne n gyɛ fɛye-Wura. Fɛ' wolaa baala fɛye-nyoro, nengyene fɛɛ ɔko gi taa taasɛ fɛye kyu lii Wurubuaarɛ ilaa ibono fɛye-ansi a gyan' imɔ so mɔ, de fɛ' nyɛ lɛɛ gɛnɔ sa mɔ dɔɔdan. ¹⁶ ɔko gi taasɛ fɛye gɛnen ilaa ibono mɔ, fɛ' nyɛ gisen de fɛ' kyu buubuu lɛɛ gɛnɔ kanpɛ sa mɔ. Fɛ' wɔra daa ilaa ibono fɛ nyi fɛye-asen dɔ yɛɛ i boran mɔ. Fɛ kya wɔra gɛnen ne ako mɛ kya saalɛ fɛye ne mɛ kya tɔgɛ ilaa nyɛnyɛn kyu lii fɛye Kirisito asonbo akyenabi dɛnsɛ abono so mɔ, mɛ laa gyi ipeeli. ¹⁷ Fo wɔra ilaa dɛnsɛ ne i gyɛ Wurubuaarɛ gɛlaarɛ dɔ yɛɛ fo' wu ɔlaa mɔ, imɔ ibono ne n boran don ibono fo laa wɔra ilaa nyɛnyɛn de fo' wu ɔlaa mɔ.

¹⁸ Kyu lii aye anyamesɛ ilaa nyɛnyɛn so mɔ, Yesu Kirisito gi wu' de aye-rɛ Wurubuaarɛ nsana i' nyɛ lɔrɔ. Mɔ ɔbono mɔ-gisen dɔ i boran sa Wurubuaarɛ mɔ gi wu' sa aye abono aye-asen dɔ iɲ boran sa mɔ mɔ. ɔ kpɛ wu' daa gikolon gibono ne, i ta. Mɛ mɔɔ daa mɔ-nyoro gibi mɔ. Mɔ-oduduu mɔ berɛ gi nyɛ gɛkyena, ¹⁹ ne o kpe ibuni dɔ kpaa tɔgɛ Wurubuaarɛ agyɛbi sa ibuni ibono Wurubuaarɛ gi tii ɔmɔ wɔra gɛtɛɛko mɔ. ²⁰ I lii fɛɛ owi ɔbono gɛnen ibuni ibono mɛ tɛ de ansi Nowa aberɛ dɔ mɔ, mɛ mɛɲ nu Wurubuaarɛ gɛdɛ. Wurubuaarɛ, mɔ, gi nyɛ gisen kyena kerɛ ɔmɔ gɛnen-n kaaborɛ ɔ yɛgɛ Nowa gi salɛ gikolii belɛ giko. Asa kalɛsɛ ako, asa

gukue ɔkara ne n nyɛ loo Nowa gikolii beɛ gibono dɔ, ne mɔmɔ abono bere mɛ nyɛ Wurubuaarɛ gi mɔɔɛɛ mɔmɔ, ne mɛ mɛɲ sii nkyu nbono gi gyi asɛnsɛ mɔ dɔ. ²¹ Wurubuaarɛ gi kyu Nowa aberɛ dɔ ilaa idɛ kyu lɛɛ mɔ Wurubuaarɛ sagyere ilaa nyiile. I kya nyiile yɛɛ Wurubuaarɛ sagyere kya mɔɔɛɛ aye ndɛ asa de aye-rɛ Wurubuaarɛ nsana i' lɔrɔ. Nkana iɲ gyɛ yɛɛ Wurubuaarɛ sagyere mɔ kya foro nyamesɛ nyoro so ineesi daa. Sagyere mɔ kya mɔɔɛɛ nyamesɛ. I lii fɛɛ nyamesɛ kya kolɛ Wurubuaarɛ yɛɛ ibono Wurubuaarɛ gi kpaarɛ mɔ-ilaa nyɛnyɛn fuɛ sa mɔ faa, ɔ' yɛɛ mɔ ɔ' bii mɔ-gisen dɔ yɛɛ kyu naa de Yesu Kirisito giwukyingi mɔ so mɔ, mɔ-ilaa nyɛnyɛn ibono ɔ wɔra mɔ iɲ baa i kya nyida mɔ-rɛ Wurubuaarɛ nsana. ²² Yesu gi kii kyon Wurubuaarɛ dɔ kpe ɔ tɛ Wurubuaarɛ gibaa gyisɛ so, ɔ kya gyi gɛwura. Wurubuaarɛ dɔ isɔɔ de ilaa ibonoana pɛwu i kya nyɛ ɔlon anyamesɛ so mɔ, Yesu ne n bo lon imɔ pɛwu so.

4

Fɛ' Kyule Yɛɛ Fo Laa Wu Awɔrɔfɔɔ Fɛɛ Yesu-lɛɛ Mɔ ɔnan

¹ Aberɛ abono Yesu Kirisito bo gɛsinkpan so mɔ, ɔ kyule yɛɛ ɔ laa wu awɔrɔfɔɔ. Imɔso fɛye kee fɛ' kyule yɛɛ fo laa wu awɔrɔfɔɔ fɛɛ mɔ-lɛɛ mɔ ɔnan. I kya nyiile yɛɛ ɔbono ɔ kya sa gɛnen Yesu-lɛɛ gɛwɔnsa gɛdɛ ɔnan ne gɛsintin, ɔ kya wu awɔrɔfɔɔ mɔ, kaasɛ gi taa ilaa nyɛnyɛn giwɔra yɛɛ ne. ² ɔ taa ilaa nyɛnyɛn giwɔra yɛɛ mɔ, ɔkara ɔbono ɔ laa san kyena gɛsinkpan so mɔ, ɔɲ baa ɔ tɛ sa mɔ anyamesɛ-lɛɛ ɔbole gɛlaarɛ ilaa. ɔ kya san kyena sa daa Wurubuaarɛ gɛlaarɛ. ³ Abono mɛ mɛɲ nyi Wurubuaarɛ agyɛbi mɔ mɛ kya nu daa de mɔmɔ-ɔbole gɛlaarɛ ilaa. Owi ɔko dɔ mɔ, fɛye kee fɛ

kya wɔra mɔmɔ-lɛɛ mɔ ɔnan. Fɛ kya wɔra ilaayan, ilaa nyɛnyɛn kpɛi-kpɛi i kya gyi fɛye-amu, fɛ kya boo nta, fɛye-rɛ fɛye-nanboana fɛ kya gyan' dabɔlɛ boo fɛ kya wɔra ilaa kpan, fɛ kya son ikperɛ wɔra ilaa ibono in bo gitɔgɛ mɔ. I kaaborɛ fɛ' bii yɛɛ i kaabo gɛnen. ⁴ Idɛ kon berɛ, fɛɲ baa fa-a kyu fɛye-nyoro mada de asa abono mɛ mɛɲ nyi Wurubuaarɛ agyɛbi mɔ de fɛ' wɔra mɔmɔ-
amu wusɛ ilaa wɔrasɛ ibonoana. Imɔso i kya dɛ mɔmɔ-
gɛnɔ, ne fɛ san bingiri ɔmɔ-oyii wɛsɛ. ⁵ Fɛ' yɛgɛ ɔmɔ
de. Gɛkaako mɔ mɛ laa yelɛ Wurubuaarɛ ansi dɔ de mɛ'
lɛɛ mɔmɔ-gɛnɔ. Wurubuaarɛ gi ti baala ibono ɔ laa gyi
anyamesɛ nbɛlɛ--asa abono mɛ ti wu' de abono mɛɲ ti
wu' mɔ pɛwu.

⁶ Kyu lii gɛnen so ne fɛ wu yɛɛ Wurubuaarɛ gi yɛgɛ
Yesu gi kpaa tɔgɛ mɔ-ɔkalan konkonɛ mɔ sa asa dabɔlɛ
de ibuni mɔ. I lii fɛɛ Wurubuaarɛ gi bun ibuni ibono
gipusɛ fɛɛ gɛnɔɔbono Wurubuaarɛ kya bun nyamesɛ
gipusɛ de ɔ' nyɛ lɛwu mɔ. Yesu gi nyɛ kpaa tɔngɛ
sa ɔmɔ faa berɛ, ne mɛ nu mɔ, Wurubuaarɛ laa sa
ɔmɔ Wurubuaarɛ asɛ gɛkyena ɔnan fɛɛ gɛnɔɔbono
Wurubuaarɛ Oduduu mɔ kya yɛgɛ nyamesɛ ɔ' nyɛ mɔ.

Kirisito Asonbo Akyenabi

⁷ Owi ɔbono ilaa kamaasɛ i laa yela ɔkara mɔ, gɛnen
owi ɔbono gi fuude. Imɔso fɛ' yela fɛye-nwɔnsa gɛten
kolon de fɛ' bii fɛye-nyoro akedabi de fɛ' nyɛ taalɛ dalaa
sa Wurubuaarɛ. ⁸ Imɔ gɛmara mɔ, ibono i tiri gikyɔ-
gikyɔ mɔ ne n gyɛ yɛɛ fɛ' kpɛ keda gɛsalaarɛ gɛbono fɛ
bo sa abara mɔ dɔ gɛnen. I lii fɛɛ gɛsalaarɛ gɛ kya kun
nyamesɛ ilaa nyɛnyɛn sakyɔ. ⁹ Asafɔ mɛ ba fɛye-gɛwi
mɔ, fɛ' bugi ansi de fɛ' sɔɔ mɔmɔ abaa anyɔ de fɛɲ sa
fɛ' lɔgedɛ. ¹⁰ Gɛnɔɔbono Wurubuaarɛ gi kyɛɛ ɔkamaasɛ
mɔ-rɛ mɔ-lɛɛ adawo kpɛi-kpɛi faa, fɛ' kyu amɔ kyu wɔra

gɛsun kyu kpaɔ abara. Fɛ' wɔra asa abono Wurubuaarɛ gi kyu mɔ-ilaa kyɛɛsɛ kpɛi-kpɛi wɔra mɔmɔ-abaa dɔ ne mɛ laa bii kerɛ imɔ so sa mɔ mɔ. ¹¹ Fo ɔbono gɛtɔngɛ ne Wurubuaarɛ gi kyu kyɛɛ fo mɔ, tɔgɛ mɔ-agyɛbi fɛɛ mɔ gbaa-gbaa ne n kya tɔngɛ. Fo ɔbono, mɔ, fo-nanboana gikpaa ne Wurubuaarɛ yɛɛ fo' kpaɔ mɔ, kyu Wurubuaarɛ ɔlon ɔbono ɔ sa fo gɛnen mɔ kyu kpaɔ mɔmɔ. Fɛ' wɔra gɛnen de i' nyɛ kyu nyisigyɛi bara Wurubuaarɛ ilaa kamaasɛ dɔ kyu naa de Yesu Kirisito so. Mɔ-nkon ne nyisigyɛi de gɛwɔragyɛi gɛ' wɔra mɔ-lɛɛ gɛkpaa-gɛkpaa. I' ba gɛnen.

ɔlaawusɛ Gyɛ Daa Ilaa Ibono I Wolaa I Dɛ Sa Yesu Asonbo

¹² Mɛ-nanboana laarɛsɛ, fɛɪ sa fɛ' yɛgɛ i' dɛ fɛyɛ-gɛnɔ yɛɛ asa mɛ kya yɛgɛ fɛ kya wu ɔlaawusɛ kyu lii Yesu ɔson mɔ so. I gyɛ ilaa ibono i wolaa i dɛ sa aye abono a sɔɔ Yesu gyɛi mɔ. I mɛɪ gyɛ ilaa pobɔrɔ. ɔlaawusɛ mɔ kya daasɛ fɛyɛ ɔ kya kerɛ daa yɛɛ fɛ sɔɔ Yesu gyɛi gɛsintin?

¹³ Gɛnɔɔbono fɛ kya wu ɔlaawusɛ fɛɛ Yesu Kirisito-lɛɛ mɔ ɔnan faa mɔ, fɛ' yɛgɛ i wɔra fɛyɛ ɔkon. I wɔra fɛyɛ ɔkon nperɛ mɔ, owi ɔbono Yesu Kirisito nyisigyɛi mɔ laa lii gɛwi mɔ, fɛ laa gyɛi ɔkon kee. ¹⁴ Nengyene asa mɛ kya saalɛ fɛyɛ kyu lii ibono fɛ gyɛ Kirisito asonbo so mɔ, fɛ gyɛ daa amudɛnsɛbo. I kya lɛɛ i kya nyiile yɛɛ Wurubuaarɛ Oduduu ɔbono ɔ bo nyisigyɛi mɔ tɛ fɛyɛ-asɛn dɔ ne. ¹⁵ Iɪ sa i ba fɛyɛ ɔko so yɛɛ ɔ laa wu ɔlaawusɛ mɔ, i' wɔra yɛɛ ɔ mɔɔ daa isa, o yuuri, ɔ tɔrɔ nbara, abɛɛ ɔ ten loo asa ilaa dɔ. ¹⁶ Nengyene Yesu Kirisito ɔson mɔ so berɛ ne asa mɛ kya yɛgɛ fɛ' wu ɔlaawusɛ mɔ, iɪ sa i' wɔra fɛyɛ ipeeli. Fɛ' faala Wurubuaarɛ yɛɛ fɛ nyɛ mɛ kya kalɛ fɛyɛ wɔra Yesu Kirisito asonbo mɔ dɔ.

¹⁷ Wurubuaare gi ti yii gese o kya biide asa giso. O yii gese lii aye abono a gye mo-biana gesintin mo so. To! Ibono Wurubuaare gi yii gese de aye faa mo, asa abono momo bere me kine yee me man wora mo-okalan konkonse mo ilaa mo, momo-lee mo de-e? Fe' bii yee momo-lee gisobiide bere gi laa tansi wora nyenyen. ¹⁸ I bo Wurubuaare agyebi mo do yee,

“Nengyene i bo lon de asa abono me kya gyi gesintin sa
Wurubuaare mo gbaa

me' nye Wurubuaare amolege kyena mo ase mo,
ne ne ilaa nyenyen aworabo abono men sele Wu-
rubuaare mo

me laa taale nye genen amolege abono?”

¹⁹ Nengyene Wurubuaare gelaare do ne fe kya wu olaawuse mo, fe' kyu feye-nyoro pewu too mo so de fe' kpe keda feye-ilaa dense giwora do. Wurubuaare obono o lee feye mo gye daa opaaworabo.

5

Abono Me Kya Gyangbara Sa Yesu Asonbo Mo

¹ Ide bere n kya laare n' tonge sa feye abono fe gye abelense fe gyangbara sa Yesu asonbo mo. Me kee n gye daa obelense n gyangbara sa Yesu asonbo fee feye. Ne wu Yesu Kirisito owi obono o kya wu olaawuse mo de me-ansi. Gekaabono Wurubuaare laa lee Yesu Kirisito baare nyisigy giwe nyiile mo, me kee n bo abono me laa nye mo-nyisigy mo do. ² N kya ka feye yee fe' kere Wurubuaare ade abono o kyu wora feye-abaa do mo so doodan fee genobono isande okparebo dense kya kere mo-isande so mo. Fe' kere momo so lii feye-asen do. In sa i' wora yee oko ne n kya nyise feye abee aterenbi so ne fe kya kere momo so. Wurubuaare so mo, fe' yee i' wora feye okon yee fe nye fe kya kere mo Wurubuaare

ade so. ³ Iḡ sa i' wɔra yɛɛ fɛ kya gyi daa gɛwura ɔmɔ so. Fɛ' wɔra asa abono mɛ laa taale kase fɛye-akyenabi de i' kpaamɔmɔ mɔ. ⁴ Nengyene Yesu Kirisito ɔbono ɔ gyɛ isandɛ akparebo ɔbelɛnsɛ mɔ laa kii ba gɛsinkpan so mɔ, fɛye abono fɛ kya kerɛ mɔ-isandɛ so fɛɛ gɛnɔɔbono nɛ tɔgɛ faa mɔ, fɛ laa nyɛ ntɛɛla nbono gi bo nyisigyɛ ne giḡ bo ɔkara mɔ.

Adega

⁵ Fɛye abono fɛ gyɛ adega mɔ kee fɛ' nu abono mɛ gyɛ abelɛnsɛ fɛye dɔ mɔ gɛdɛ. Fɛye abono pɛwu fɛ sɔɔ Yesu gyi mɔ fɛ' bara fɛye-nyoro gɛsɛ sa abara. I lii fɛɛ i bo Wurubuaarɛ agyɛbi dɔ yɛɛ,

“Wurubuaarɛ kya tii asa abono mɛ kya nyiile mɔmɔ-nyoro mɔ ɔkpa

de mɛḡ sa mɛ' nyɛ mɔmɔ-gɛlaarɛ.

Abono mɛ kya bara mɔmɔ-nyoro gɛsɛ mɔ berɛ,

Wurubuaarɛ kya sa mɔmɔ so gɛwɔnsa dɛnsɛ.”

⁶ Imɔso fɛ' bara fɛye-nyoro gɛsɛ sa mɔ Wurubuaarɛ ɔbono ɔ gyɛ Gitɔbelɛ mɔ de ɔ' nyɛ kosore fɛye-gimu aberɛ abono i kaaborɛ mɔ. ⁷ Fɛ' kyu fɛye-ilaa tirisɛ pɛwu wɔra mɔ-abaa dɔ. I lii fɛɛ ɔḡ dɛ fɛye gidɛ. ⁸ Fɛ' yela fɛye-nwɔnsa gɛten kolon de fɛ' bii fɛye-nyoro akedabi. I lii fɛɛ fɛye-ɔkyobo, ilaa nyɛnyɛn pɛwu gɛmu mɔ, naa ɔ kya kingi fɛɛ guuni ɔbono akon a da mɔ ne ɔ naa ɔ kya laarɛ ɔbono ɔ laa nyɛ keda wɛ mɔ. ⁹ Fɛ' yelɛ fɛye-gikagyan gibono fɛ ka gyan Yesu so mɔ ken-ken de fɛ' kɔ de ilaa nyɛnyɛn pɛwu gɛmu mɔ. Fɛ' nyingi yɛɛ fɛye-nanboana abono mɛ ka gyan Yesu so ne mɛ bo mɛ bo gɛsinkpan gɛten kamaasɛ so mɔ kee mɛ kya wu ɔlaawusɛ ɔbono ɔnan fɛ kya wu faa. ¹⁰ Fɛ laa kpɛ wu ɔlaa ḡmaraa daa. Wurubuaarɛ ne n gyɛ gitolon pɛwu gɛmu, ne mɔ mɔ ne n tɔgɛ fɛye yɛɛ fɛye-rɛ Kirisito ginyamesɛ kolon mɔ so

mɔ, fɛ' baa nyɛ mɔ-nyisigyɪ ɔbono ɔŋ bo ɔkara mɔ. Fɛye-ɔlaawusɛ gɛmara mɔ, gɛnen Wurubuaarɛ kolon ɔbono ne nan lɔrɔ fɛye, o' sin fɛye, ɔ' sa fɛye ɔlon de ayaa yelesɛ, de fɛ' nyɛ taalɛ ka gyan Yesu Kirisito so kpaa lii. ¹¹ Gɛwuragyi gɛ' wɔra mɔ-lɛɛ gɛkpa-a-gɛkpa-a. I' ba gɛnen.

Afaala Tiikarɛ

¹² Aye-nanbo Siilasɛ ne n kpaa me ne nɛ ŋmarasɛ fɛye gɛnen ɔwolɛ teri baarɛ. Gɛnɔɔbono n kya wu mɔ Yesu ɔson mɔ dɔ mɔ, n kya sɔɔ mɔ gyi. Nɛ ŋmarasɛ fɛye daa de n' tɔgɛ keda fɛye-nyoro de n' tɔgɛ tigi fɛye yɛɛ Yesu ilaa ibono n kya nyiile mɔ i gyɛ gɛsintin ilaa ibono Wurubuaarɛ kya kyu mɔlɛgɛ anyamesɛ mɔ. Fɛ' keda imɔ dɔ ken-ken. ¹³ Yesu asonbo gikpen gibono gi bo Babilon ɔsowolɛ so mɔ mɛ kya faala fɛye. Wurubuaarɛ gi tɔɔsɛ fɛye-rɛ ɔmɔ lɛɛ yɛɛ fɛ' lɔrɔ fɛye-nyoro yela sa mɔ. Aye-nanbo Maako ɔbono ɔ wɔra fɛɛ me-bi mɔ kee kya faala fɛye. ¹⁴ Fɛ' kyu gɛnyi-abi afaala faala abara. Fɛye abono pɛwu fɛye-rɛ Yesu Kirisito fɛ wɔra nyamesɛ kolon mɔ, Wurubuaarɛ gisen yuuli gi' wɔra fɛye-lɛɛ.

ḠḠḠḠ ḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov 2021

4cc402b4-139a-5f33-9af9-fbf62307f663